

Matumuuna Inatsisartut Suleriaasianni § 33 naapertorlugu aalajangiiffigisassatut siunnersuut imaattoq Naalakkersuisunit saqqummiunneqarpoq:

Inuit innarluutillit pisinnaatitaaffii pillugit isumaqatigiissummut 13. decembari 2006-imeersumut Kalaallit Nunaata nammineq atuutilersillugu tapiliussamut ilanngunnissaa pillugu Inatsisartut aalajangiiffigisassaattut siunnersuut
(Peqqissutsimut Inunnullu Innarluutilinnut Naalakkersuisoq)

Tunngavilersuut

Aalajangiiffigisassatut siunnersuut Inuit Innarluutillit pillugit Naalagaaffiit Peqatigiit isumaqatigiissutaata malinneqarnissaanut iliuusissatut pilersaarummi 2024-2034-mi suliniutitut allassimavoq.

Isumaqatigiissut malillugu inuit ataasiakkaat eqimattalluunniit pisinnaatitaaffimmi innarlerneqartut isumaqarunik nammineq atuutilersillugu tapiliussaq atorlugu Naalagaaffiit Peqatigiit inunnut innarluutilinnut ataatsimiititaliaannut maalaaruteqarnissamut periarfissaqarput aamma taanna atorlugu isumaqatigiissummik ingasattumik systemikkullu innarliisoqarneranut atatillugu ataatsimiititaliaq misissuinissamut periarfissinneqassaaq.

Pisinnaatitaaffiit tamaasa isumaqatigiissummi allassimasut maalaarutigineqarsinnaapput. Ataatsimiititaliap maalaarummik nalilersuilluni suliaqarnissaanut maalaaruteqarnissamut piumasaqaatit assigiinngitsut eqqortissimanissaat piumasaqaataavoq, tassunga ilanngullugit maalaarut tunngavissaqanngitsuussanngilaq imaluunniit naammaginangitsumik tunngavilersorneqanngitsuussanngilaq aamma nunani tamani eqqartuussivinni periarfissaaruttoqarsimassaaq. Ataatsimiititaliap aalajangerpagu maalaarut nalilersorlugu suliariniarlugu, suliaq pillugu siunnersuutini innersuussutinilu Namminersorlutik Oqartussanut maalaaruteqartumullu ilisimatitsissutigissavai.

Eqqartuussissutitigut suliarineqarnissaa pineqanngilaq. Ataatsimiititaliaq isumaqatigiissummik pituttuisumik nassuiaasinnaanngilaq sulialluunniit aalajangersimasut aalajangiiffigisinnaanngilai. Maalaarut pillugit suliani ataasiakkaani ataatsimiititaliaq taamaallaat siunnersuuteqarlunilu innersuussuteqarsinnaavoq. Suliap suliarineqarnerata nalaani ataatsimiititaliaq iliuuserineqarallartussanik innersuussuteqarsinnaavoq.

Naalakkersuisut missingiummut oqaaseqaataat

Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat Inatsisartut 2012-imi akuerivaat taamaniillu ilaatigut Inuit innarluutillit tapersorsorneqarnissaannut Inatsisartut inatsisaanni isumaqatigiissut siuarsarsimavaat.

Inunnut innarluutilinnut pisinnaatitaaffiit suli annerusumik nukittorsarniarlugit suliffeqarfiit pisinnaatitaaffiit pillugit suliaqartut arlallit, assersuutigalugu Inuit innarluutillit pillugit oqaaseqartartoq innersuussuteqarpoq Naalagaaffiit Peqatigiit isumaqatigiissutaannut Kalaallit Nunaat isumaqatigiissummut tapiliussamut ilanngutissasoq.

Nammineq atuutilersillugu tapiliussamik ilanngussineq kingulleq Inuit Innarluutillit pillugit Naalagaaffiit Peqatigiit isumaqatigiissutaata malinneqarnissaanut Naalakkersuisut iliuusissatut pilersaarutaanni 2024-2034-mi ilanngunneqarpoq.

Pisortanut aningaasaqarnikkut allaffissornikkullu kingunerisassat

Nammineq atuutilersillugu tapiliussaq aningaasaqarnikkut kinguneqartitsinngilaq. Tamatumani tunngavia tassaavoq nunatsinni maalaaruteqarnermut periarfissat tamarmik atorneqareerpata aatsaat komiteep maalaarutinit tunngasut suliat suliarisinnaavai. Komitemit oqaaseqartoqarnissaa inatsisitigut pituttugaanngilaq aammalu maalaarutit amerlassusai killeqassasut naatsorsuutigisariaqartut tamanna misilittakkat Danmarkimeersut paasinarsitippaa.

Danmarkip ulloq 23. septembari 2014-imi nammineq tapiliussamik atulersitsineraniit maalaarutit pillugit suliat amerlassusaat pillugit Peqqissutsimut Inunnullu Innarluutilinnut Naalakkersuisoqarfik Social- og Boligministeriemit paasissutissanik pissarsisimavoq. Social- og Boligministeriemit ilisimaneqarpoq Danmarkimi nammineq atuutilersillugu tapiliussap 2014-imi atuutileraniit maalaarutinit marlunnik nalunngisaqarlutik.

Maalaarutit pillugit sulianut ataasiakkaanut tunngatillugu Naalagaaffiit Peqatigiit inunnut innarluutilinnut ataatsimiititaliaannit saaffiginnissutit akisarnissaannut atatillugu allaffissorneq eqqarsaatigalugu pisortanut annikinnerusutigit kinguneqarsinnaavoq.

Namminissarsiorlutik inuussutissarsiuteqartunut aningaasaqarnikkut allaffissornikkullu kingunerisassat

Namminersorlutik inuussutissarsiuteqartunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunerisassat

Isumaqatigiissut malillugu inuit ataasiakkaat eqimattalluunniit pisinnaatitaaffimmi innarlerneqartut isumaqarunik nammineq atuutilersillugu tapiliussaq atorlugu Naalagaaffiit Peqatigiit inunnut innarluutilinnut ataatsimiititaliaannut maalaaruteqarnissamut periarfissaqalissammata innuttaasut innarluutillit maalaaruteqarnissamut periarfissaat amerlanerulissapput

Tusarniaaneq

Meeqqanut, Inuusuttunut Ilaqutariinnullu Naalakkersuisoqarfik, Isumaginninnermut, Suliffeqarnermut Nunamullu Namminermut Naalakkersuisoqarfik, Atuisartoqarnermut Unammilleqatigiinnermullu Aqutsisoqarfik (Isumaginninnermi Naammagittaalliuuteqartarfik pillugu), Aningaasaqarnermut Akileraartarnermullu Naalakkersuisoqarfik, Inuussutissarsiornermut, Aatsitassanut, Nukissiutinit, Inatsisit Atuutsinneqarnerannut Naligiissitaanermullu Nalaakkersuisoqarfik, Nunanut Allanut Ilisimatusarnermullu Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik aamma Ineqarnermut, Attaveqaasersuutinit Isorliunerusunullu Naalakkersuisoqarfik tusarniaavigineqarput.

Aningaasaqarnermut Akileraartarnermullu Naalakkersuisoqarfimmiit tusarniaanermi akissuteqaat ilanngunneqarpoq. Tusarniaavigineqartut allat oqaaseqaateqanngillat imaluunniit isumasioqatigiinnermut akissuteqaammik nassiussisimanngillat.

Ilanngussat

1. Inuit innarluutillit pisinnaatitaaffii pillugit isumaqatigiissummut 13. decembari 2006-imeersumut nammineq atuutilersillugu tapiliussaq
2. Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaannut nammineq atuutilersillugu tapiliussamut Kalaallit Nunaata malinninnissaa pillugu allakkiaq